



2. august 2023

UKA 2023/154

Inatsisartut Suleriaasianni § 36 naapertorlugu apeqquaqqaat aallaavigalugu siunnersuut imaattoq matumuuna saqqummiuppara:

Peqqinnissaq pillugu sillimmasersinnaanerup atuutilersinneqarneratigut peqqinnissaqarfitsinnut oqilisaataasinnaanersoq pillugu apeqquaqqaat aallaavigalugu oqallisissiasatut siunnersuut.

(Atassutip Inatsisartuni Ilaasortaaitai)

Siunertaq ataasiinnaavoq. Tamatta pisariaqartitsinitsinni nakorsiarsinnaalertariaqarpugut. Timerput nalunngilarput, asuliinnarlu meeqqagut napparsimatillugit nakorsamut sianernej ajorpugut. Nalunngilarpullu ilaqutariippassuit Danmarkimut nuuttartut pitsaanerusumik peqqinnissaqarfimmiit sullinneqarumallutik, toqqissisimaneq ujartorlugu.

Atassummiit peqqinnissaqarfik pillugu pingasunik siunnersuuteqarpugut immikkut oqilisaataasinnaasunik, imminnullu aamma attuumassuteqarput ataatsikkullu atuutilersinneqarpata annerusumik nunatta karsianiit aningaasartuuteqanngikkaluarluta peqqinnissaqarfitsinnut oqilisaataasinnaasunik. Allannguerusussutsumik oqariartuuteqartuarsinnarluta aamma timitalerlugu iliuuseqarsinnaasariaqarpugut.

Peqqinnissaq pillugu sillimmasersinnaanikkut aaqqissuusseqqinnerup innuttaasut tamarmik naligiimmik sullinneqarsinnaanissaat qulakkeerneqarsinnaalissaaq, kiisalu namminersortunut nakorsiarniaraanni aamma atorsinnaassalluni. Uanilu peqqinnissaq pillugu sillimmasersinnaanissaq eqqartussallugu maanna saqqummiupparput, ilaatigut aamma sygesikringitut taaneqartartoq taamaallaat pisortani peqqinnissaqarfiisigut aaqqissuunneqarsimagaangat, aamma tusaarusullusi qanoq ilusilersorneqarsinnaanersoq, qaqugukkut qanorlu annertutigisumik atorneqarsinnaanera tikkuaffigerusullugu.

Ilanngullugumi eqqartorneqarsinnaammat nappaatinut allanullu inuup nammineq akisussaaffigisartagaani sorliit aamma taassuminnga sygesikring atorlugu pisortaniit akiliunneqarsinnaanissaq. Uanilu eqqaaneqarsinnaapput inooriaatsikkut nappaatit, pujortartaraanni, illersuuteqanngitsumik atoqateqarsimanikkut nappaatit tuniluuttut immaqalu aamma naartuersittarnikkut atuutissanersoq immaqaluunniit taakkununga killilimmik atuutissanersoq. Siunertaavormi aamma uagut inuit immitsinnut paarinerulernissarput, peqqinnerusumik inoorusussuseqarneq, peqqinnissaqarfitalu artukkinnginnissaa aamma siunertaapput.

Oqallisissiaq saqqummiuppara isummersoqatigerusullusi, suleqatiseralusilu tullissaanut alloriaateqarnissamut.